

Is Surat Ni Epustul Santiago

Is Mehitenged te Surat ni Santiago

Kayi te surat ni Santiago wazè din en ipelivedlived is ibpesavut din. Midsawey zin is menge etew he egkagi he tumutuu sikandan te Megbevayà, iyan, kenà meupiya is menge vaal zan. Ke sikandin te, “Wazè din pulus emun egkagi is etew te midtuu sikandan te Megbevayà piru wazà meupiya he menge vaal zin.” Kayi te surat ni Santiago migamit sikandin te menge petug-iringan iring kayi: is etew he eduwazuwa impetug-iring din te vagel he minsan hendei zà duen hiyupa te keramag. Is etew he sepian impetug-iring din te vulak su megaan dà heini egkegangu su emun ebpatay haazà is sepian segugunè dà egkahanew ne egkeewaan din is ketigeyunan din. Ne impetug-iring din daan is dilà te etew te hapuy su segugunè dà heini ebpekevinsul te meluag su mahabet he menge etew is ebmezaat is gehinawa zan tenged te lalag he egkezineg dan. Duen daan nekagi ni Santiago kayi te surat din he igketingkemed te ebpekevasa zuen. Ke sikandin te: “Is tumutuu ki Jesus kinahanglan he medlipey emun egkeumahan te kenè en ebpeked-iiring he penggezam.” Nekagi zin daan he kenà meupiya ke ibpelavi ta is sepian, ne is sepian he edluplupigen din is egkaayuayu siguradu he edsilutan sikandin te Megbevayà.

1 ¹Iyan a si Santiago is tegisurat kayi. Suluguen a te Megbevayà wey te Nengazen tew he si Jesu Kristu. Kemusta kew is langun he menge gaked te Megbevayà he nekedsusuwey zini te tungkup te kelibutan.

Is Penggezam

²Menge suled, mebmelipayen kew emun merasey is egkeulaula niw tenged te idtugut te Megbevayà he zuen ebarangbarang he penggezam te kedtuu niw kandin. ³Su nesavut niw en he emun egkeantus niw is penggezam, egkevigeran is ked-antus niw. ⁴Ne utew zaan kinahanglan he kenà mehugkà is kebpuhung niw ked-antus su emun ebpuhung ki ed-antus te merasey egkehimu ki he metau wey wazà igkesewayi kenita wey wazà

kurang te kedtuu ta te Megbevayà. ⁵Ne ke zuen minsan hentei keniyu he egkeregenan su kenè din egketueanan ke hengkey is meupiya he paagi, mebuyù te ketau ziyà te Megbevayà, ne ebegayan sikandin su metulanged sikandin ne kenè ki zin edewayen ke ebuyù ki. ⁶Ne emun ebuyù kew te ketau ziyà te kandin kinahanglan he edtuu kew he egkezawat niw te wazà duwazuwa. Su is etew he eduwazuwa, egkehalinhalin layun is isip din. Iring sikandin te vagel ziyà te zagat he minsan hendei zà duen hiyupa te keramag. ⁷Is etew he iring kayi, kinahanglan he kenè din isipa he ibegey kandin te Megbevayà is ebuyuen din ⁸su zuwazuwa is ed-isipen din; kenè din edserigan is Megbevayà, ne kenà daan egkeserigan is minsan hengkey he ulaula zin.

Is Kelipey te Egkaayuayu wey Sepian

⁹Kinahanglan he mebmelipayen is egkeayuayu he tumutuu emun ibpelavew sikandin te Megbevayà. ¹⁰Kinahanglan he mebmelipayen daan is sepian he tumutuu emun ibpekevavà sikandin te Megbevayà; su is sepian, egkeawà daan sikandin keuzemà iring te kevukad te sagbet. ¹¹Edsilaan is sagbet te andew he utew meinit, ne egkelay-ub, ne egkegangu is kevukad din, ne kenè en maan dutun meupiya he ed-ahaan. Ne iring din ded daan is sepian he etew su egketik-ew sikandin ebpatay ne egkeengkezan din is kebpem-ehè din te ketigeyunan.

Is Penuley

¹²Utew zeyzey is etew he ebpurung ed-antus te penggezam kandin su emun egkeahà he hustu is kedtuu zin, ebegayan sikandin te untung he wazà pidteman an he iyan impenaad te Megbevayà diyà te langun he ebmahalen dan sikandin diyà te gihinawa zan.

¹³Emun egkepenulayan is minsan hentei kenitew, kenè tew ed-isipen he iyan nekepenuley kenitew is Megbevayà, su kenà egkepenulayan is Megbevayà, ne kenè din daan ebpenulayan is minsan hentei.

¹⁴Egkepenulayan is etew emun ed-egaken sikandin te mezaat he kebayè din. ¹⁵Ne emun edtumanen din is suat din, ebpekesalà sikandin. Ne iyan dutun pangkus te etew ke ebpeniguduwan din is ked-ulaula te mezaat is kemetayen.

¹⁶Menge minahal ku he suled, kenè niw tuuwi is kenà tutuu. Kenà ebpenuley is Megbevayà. ¹⁷Is minsan hengkey he ibegey kenitew he meupiya he wazè din kurang, ne ziyà ebpuun te Megbevayà he iyan nenlimbag te langun he edsiga ziyà te langit. Egkengehalinhalin heini, iyan, is Megbevayà, kenà mulà sikandin edhalin, ne kenà egkehalin te minsan hengkey. ¹⁸Tenged te iyan egkesuatan din midhimu kiw zin he menge anak din pinaagi te kebpesevuta zin kenitew te tutuu he tuluuwen. Egkesuatan din he iyan kiw edhimuwen din he lavew te langun he menge linimbag.

Is Tutuu he Kebpeming

¹⁹Kenè niw lipati, minge minahal ku he suled, he is minsan hentei kenitew, kinahanglan he layun andam he ebpeming te Lalag te Megbevayà ne kenè ta ipetuwas is kenita zà he lalag ne kenè ki zaan melemu he egkepauk. ²⁰Su emun egkepauk ki kenè ta zutun egketuman is egkesuatan te Megbevayà. ²¹Engkezi niw en is minsan hengkey he meremerik he ulaula wey is kelelalung. Pesakup kew te Megbevayà; hemeni niw is lalag din he impesavut en keniyu su iyan ebpekelibri keniyu te silut.

²²Kinahanglan he edtumanen niw is Lalag te Megbevayà. Emun ebpeming niw zà is lalag din ne kenè niw edtumanen, henduen be te edterteruen niw is gehinawa niw. ²³Su ke zuen minsan hentei he taman dà te kepeming te Lalag te Megbevayà, iyan, kenè din edtumanen, iring sikandin te etew he ed-alung diyà te pegelungan. ²⁴Egkeehè din is dagwey zin, iyan, megaan dà. Ne egkelipatan din dutun ke hengkey is neehè din. ²⁵Iyan, ke zuen etew he ebpurungan din ed-istudyuwi is kesuguan he wazè din kurang he iyan ebpekelibri kenitew, ne kenè din edlipatan, kekenà, edtumanen din, edtuvazan te Megbevayà is minsan hengkey he ed-ul-ulahan din.

²⁶Emun iyan isip te etew is hustu is ked-ezapa zin te Megbevayà, iyan, kenè din edtengkaan is kegkagikagi zin, wazà pulus te ked-azap din su neterteruan din dà is gehinawa zin. ²⁷Is etew he hustu is ked-azap din te Megbevayà, edlikayan din is minge mezaat he ulaula he iyan ed-ul-ulahan te minge etew zini te kelibutan he kuntada te Megbevayà. Meupiya mulà is ulaula zin. Ebpurungan din is minge edlised he minge ilu he vatà wey minge valu he vahi. Iyan heini egkesuatan te Amey tew he Megbevayà he paagi te ked-ezapa tew kandin.

Indawey is Kebpeleviya te Zuma

2 ¹Minge suled, geina te minge tumutuu ki ki Jesu Kristu, is mekegegeh he Nengazen, kinahanglan he pedrerepenga ta is kedtehuza ta te langun he minge etew. ²Penenglitan duen edseled diyà te simbahan niw he sepian he edsisising te vulawan ne utew mahal is bisti zin. Ne zuen daan edtampu he egkeayuayu ne nenggeremisey is kandin he bisti. ³Ne edtehuza niw heeyan is meupiya is bisti zin ne ke sikiyu te, “Kayi ka te meupiya he vangkù.” Iyan, haazà mulà is egkeayuayu, egkegiyan niw zà te, “Kayi ka hitindeg,” wey ke, “Dini ka pinuu te saag uvey te kedì he vangkù.” ⁴Kenè be mezaat heeyan he ulaula su kenè niw ebpedrerepengen is kedtahud niw te minge zuma niw he tumutuu su kunaan niw ke hustu ke ebmahalen ta is sepian ne kenà is egkeayuayu.

⁵Peminga niw, minge minahal ku he suled, is ibpesavut ku keniyu. Duen mibpili te Megbevayà he egkengeayuayu. Ne minsan deisek is

ketigeyunan dan midhimu te Megbevayà he zekelà mulà is kedsarig dan kandin ne iyan sikandan edtuvazan din pinaagi te kedhadì din sumalà is penaad din diyà te langun he ebmahalen dan sikandin diyà te gehinawa zan. ⁶Iyan, sikiyu mulà, wazè niw kedtahud dutun te egkengeayuyu. Hentei is ebpenlupig keniyu? Iyan is menge sepian. Ne hentei is edsumbung keniyu ziyà te etuvangan te huwis? ⁷Hentei is edsumpalit te mahal he ngazan ni Jesus he iyan tegigaked kenitew? Iyan is menge sepian.

⁸Utew meupiya is ed-ul-ulahan niw emun edtumanen niw is lavew he sugù te Nengazen he egkevasa niw ziyà te insurat he lalag din he edhenduen te, “Kinahanglan he mahala nu is duma nu; isipa nu sikandin he iring te kenikew en he gehinawa.” ⁹Iyan, emun duen niw ibpelavi, ebpekesalè kew. Ne sumalà is impenurù dutun te kesuguan te Megbevayà he imbilinbilin ni Moises, mesinupaken kew. ¹⁰Su minsan ke sevaha zà duen te menge sugù te kesuguan is egkesupak te etew, ed-isipen gihapun te Megbevayà he mesinupaken sikandin he iring te nesupak din is langun he menge sugù. ¹¹Su is migkagi te, “Kenè nu selselai is esawa nu,” ne iyan daan migkagi te, “Kenè ka pemumunù.” Ne minsan wazè nu selselai is esawa nu, ke nekevunù ka nesupak nu en is tivuuk he kesuguan su sebsevaha zà is tegisugù dutun te langun he menge sugù.

¹²Duen selakew en he kesuguan he ebpekelibri kenita wey ki kenà mekesalà ne iyan heini kesuguan he idhukum kenita keuzemà te Megbevayà. Ne tenged kayi kinahanglan he ebpurungan ta is menge lalag ta wey ulaula ta su wey kenè ta mesupak haazà is kesuguan. ¹³Su is Megbevayà, kenè din keuzemà egkehizuwan is etew he wazè din hizu te zuma zin. Iyan, is etew mulà he hihizuwen, wazà kinahanglan he egkehandek sikandin su kenà sikandin edsilutan te Megbevayà.

Is Tutuu he Kedtuu

¹⁴Menge suled, wazà pulus te kedtuu te minsan hentei ziyà te Megbevayà emun kenà egketuusan is kedtuu zin pinaagi te menge ulaula he meupiya. Is kedtuu he iring dutun, ne kenà tutuu, ne kenà din igkelibri te silut. ¹⁵Su penenglitan duen menge suled tew he tumutuu ne edlised sikandan tenged te wazè dan igkekuwa te bisti wey egkekaan. ¹⁶Ne emun egkegiyan tew zà sikandan te, “Ehè kew zà. Berakat he mekekuwa kew te egkeenen niw wey igkebisti niw,” iyan, kenè tew sikandan edtevangan, wazà pulus te migkagi tew. ¹⁷Iring din ded daan is etew he egkegiyen din he edtuu sikandin, iyan, kenà meupiya is menge ulaula zin. Egkesavut ta zutun he kenè bes tutuu is kedtuu zin.

¹⁸Ne ke zuen egkagi te, “Edtuu zà is sevaha te Megbevayà wey melibri sikandin te silut ne is duma, ne ed-ulaula te meupiya wey sikandin melibri, ne pudu hustu.” Iyan, iyan tavak ku zutun te zezuwa is: kinahanglan

he edtuu ki, iyan, kenà egkehimu he tutuu is kedtuu ta te Megbevayà ke kenà egketuusan haazà is kedtuu ta pinaagi te minge ulaula ta he meupiya. Kinahanglan he ibpeehè ta is kedtuu ta pinaagi te minge ulaula ta. ¹⁹Emun midtuu ki he sebsevaha zà is Megbevayà utew meupiya heeyan, iyan, kenè pa hustu su minsan is minge mezaat he mulin-ulin, midtuu zan daan te iring keniyen, iyan, egkerkeren dan te kegkehandek su netuenan dan he edsilutan sikandan keuzemà. ²⁰Uteu kenà metau he ed-isip is etew he iring dutun. Ebpenuren ku sikiyu he is kedtuu ta, emun kenà egketuusan pinaagi te minge ulaula ta he meupiya, ne kenà ebpekelibri kenita te silut. ²¹Hengkey is paagi he impetimaan te kepuun tew he si Abraham he iyan impeketezenga kandin te Megbevayà? Iyan is minge ulaula zin dutun te kedtumana zin te insugù kandin te Megbevayà te kebpehata zin pezem te anak din he si Isaak. ²²Netuenan ta he pinaagi te kedtuu zin, midtuman din is insugù kandin ne pinaagi zaan te kedtumana zin kayi, neheget is kedtuu zin te Megbevayà. ²³Ne tenged dutun egkesavut ta he utew tutuu sikan is insurat he Lalag te Megbevayà he edhenduen te, “Midtuu si Abraham te Megbevayà, ne tenged dutun te kedtuu zin, mid-isip sikandin te Megbevayà he metazeng.” Ne migeraran sikandin he Emigu te Megbevayà. ²⁴Ne tenged dutun egkesavut ta he ed-isipen ki he metazeng te Megbevayà ke zuen minge ulaula ta he meupiya he tuus te kedtuu ta ne kenà tenged te kedtuu zà he wazè din tuus.

²⁵Ne iring dutun daan is kedtuu ni Rahab, is bahi zengan he mezaat is dengge din. Umba mid-isip sikandin he metazeng te Megbevayà su zuen meupiya he mid-ulaula zin su impeseled din te valey zin is minge sugù ni Josue, ne midtevangen din sikandan wey zan mekepelaguy pinaagi te selakew en he ibayà. ²⁶Is lawa te etew, emun wazè din en gehinawa, egketuusan ta he minatey en ne wazè din en pulus. Ne iring din ded daan is kedtuu te minsan hentei su emun kenè egkezumahan haazà is kedtuu te minge ulaula he meupiya, wazà daan pulus dutun te kedtuu zin.

Is Dilà te Eteu

3 ¹Menge suled, deyzey ke kenà mezakel keniyu is egkesuat he ebpenurù, su sikami is ebpenurù, utew meheget keuzemà is kedsusiya kenami te Megbevayà, kenà te ebpepenurù kenami. ²Sikitew is menusiya, layun kiw egkesayep te mezakel he paagi. Ne ke zuen etew he kenà egkesayep pinaagi te kegkagi zin, wazè en igkesewayi kandin. Egkeveyveyaan din is tivuuk he lawa zin wey kenà mekeulaula te mezaat. ³Egkekangan ta is kudà su wey ta meveyveyai ke hendei ta ibpepevayà. ⁴Ne minsan is utew zekelà he barku he egkeuwit te mevendes he keramag, egketandang ta is ibayè din pinaagi te utew zeisek he pengawid din. ⁵Ne iring din ded daan is dilà te etew su minsan pa te utew zeisey egkegamit gihapun te kedentala te zekelà he ibpezalig.

Ne iring daan dutun is ketelunan su minsan pa te utew meluag egkevinsulan gihapun te zeisek he hapuy. ⁶Ne iring daan te hapuy is dilà te etew su ebpekezezaat ne iyan puunà te minsan hengkey he mezaat he ulaula. Pinaagi te zilà egkeeneb te mezaat is tivuuk he isip ta wey gihinawa ta. Iyan ebpekerasey kenita te tivuuk he untung ta; iring te hapuy he ziyà ebpuun te Impirnu.

⁷Netuenan ta he egkeveyveyaan te etew is minsan hengkey he linimbag su zuen nelayam he minge langgam, minge tagbis, minge pait, wey minsan minge uled. ⁸Iyan, wazè pa etew he nekevayàbayà te zilè din. Uteu lalung is dilè ta ne kenà egkeegen. Iring te hilu su ebpekezezaat. ⁹Egemiten ta is dilè ta emun ebpeelematan ta is Amey tew he Nengazen, ne nasì ta zaan egemita ke ebpenrewakan ta is minge zuma ta he midlimbag te Megbevayà he iring te zagwey zin. ¹⁰Uteu heini igkeinuinu su sebsevaha zà is puunà te kedrawak wey kebpeselamat! Minge suled, kenà heini meupiya. ¹¹Emun penenglitan duen kalut, kenà egkehimu he zutun ebpuun is wahig he meupiya wey is wahig he mepait. ¹²Minge suled, emun ebegas is kayu he igira kenà egkehimu he ulivu is begas din. Ne emun ebegas is gawed he paras kenà egkehimu he igira is begas din. Ke zuen kalut he zutun ebpuun is wahig he mepait, kenà egkehimu he zutun ebpuun is wahig he kenà mepait.

Is Tutuu he Ketau

¹³Is minsan hentei keniyu he metau wey zekelà is selevutan, ipeehè din pinaagi te meupiya he ulaula zin. Kinahanglan he kenà sikandin mepelevawen dutun te kebpaahaa zin te ketau zin pinaagi te minge meupiya he ed-ul-ulahan din. ¹⁴Iyan, emun egkesina sikandin wey mepelevawen, kinahanglan he kenè din izantal is ketau zin wey is meupiya he ulaula zin su tarù is ketau he iring dutun ne ebpekesupak te tutuu he tuluuwen. ¹⁵Kenà haazà sikan is ketau he ebpuun te Megbevayà, kekenà, dini zà ebpuun te kelibutan. Kenà iyan is ketau he ibegey te Wagas he Mulin-ulin, kekenà, ebpuun te mezaat he mulin-ulin. ¹⁶Ke zuen minge etew he egkesina wey mepelevawen, utew zan egkesemuki ne ed-ul-ulahan dan is minsan hengkey he mezaat. ¹⁷Is etew he ziyà ebpuun te Megbevayà is ketau zin, wazà igkesewayi kandin. Melineu is kedepitè din te zuma he etew, ebpurangan din is minge zuma zin; kenà sikandin mevurut, kekenà, mepezumdumahan. Hihizuwen wey metulanged sikandin; wazè din ibpelavi he minsan hentei ne kenà uvag dà is kedtuu zin. ¹⁸Iring te venì is kelineu. Ibpemula te minge menhuhusey ne iyan egkeragun dutun is metazeng he minge ulaula.

Is Kebpesakup te Megbevayà

4 ¹Hengkey is puunà te minge kesevaan wey tebek diyan te keniyu? Iyan is minge mezaat he kebpayè niw he ebpekigkuntada te meupiya

he ulaula. ²Duen egkesuatan niw he kenè niw egkekuwa ne tenged dutun ebpekeisip kew te kebpeemunù. Duen egkeimahan niw, iyan, kenè niw egkeangken ne tenged dutun ebpekidsavè kew wey ebpekidtebek kew. Umba kenè niw egkekuwa is egkesuatan niw su kenè niw ebuyuen diyà te Megbevayà. ³Ne minsan ke ebuyuen niw ziyà te kandin, kenè din ibegey su mezaat is tuyù niw te kebuyua niw kayi. Iyan ketezengan te kebuyù niw is wey niw metuman is mezaat he kebayè niw.

⁴Kenè kew metinumanen te pesarig niw ziyà te Megbevayà. Wazè niw ves metueni he emun iyan niw egkesuatan is mezaat he ed-ul-ulahan te minge kuntada te Megbevayà dini te kelibutan, ne minge kuntada kew zaan te Megbevayà. Is minsan hentei he iyan egkesuatan din is mezaat he ulaula zini te kelibutan, mibpekigkuntada sikandin te Megbevayà.

⁵Kenè niw isipa he kenà tutuu sikan is insurat he Lalag te Megbevayà he edhenduen te, “Is gehinawa he imbegey kenita te Megbevayà, nehimu he mezesen is kegkesuati zin te mezaat he ulaula, ⁶iyand, mezesen pa utew is tavang kenita te Megbevayà.” Ne tenged dutun duen insurat he lalag din he edhenduen te, “Egkuntedahan te Megbevayà is mepelevawen, iyan, edtevangand din mulà is ebpesakup kandin.”

⁷Ne tenged dutun, pesakup kew te Megbevayà. Sukuli niw si Setanas ne ebpelaguy keniyu. ⁸Aput kew ziyà te Megbevayà ne ed-uvayan kew zin. Sikiyu is mekesesalà, engkezi niw is minge ulaula niw he mezaat. Sikiyu is uvag dà is kedtuu zan, pelumpiyuwi niw te Megbevayà is isip niw wey gehinawa niw. ⁹Meseeng kew tenged te minge ulaula niw he mezaat; medlugib kew wey medsinegew kew; kenè kew engit, kekenà, erang kew; kenè kew medlipey, kekenà, mebmezaat is gehinawa niw. ¹⁰Pesakup kew te Megbevayà, ne ibpelavew kew zin.

Is Kedsudì

¹¹Minge suled, kenè kew mebpesudsudiey wey mebpesewsewayà su is edsudì wey edsawey te zuma zin he tumutuu, ne iring te edsudien din wey edsewayen din is lavew he sugù. Ne emun edsewayen ta haazà is sugù, kenè ta edtumanen, kekenà, edsumpeliten ta. ¹²Sebsevaha zà is ebpuunan te kesuguan he iyan is Megbevayà ne sebsevaha zà daan is duen din kegehem te kedhukum te minge ulaula te menusiya ne iyan ded daan is Megbevayà. Iyan sikandin edsilut ne iyan daan ebpekelibri te silut. Iyan, sikita mulà, wazè ta kegehem te kedhukum te minsan hentei.

Is Kedantal te Eteu te Egkehitavù Kandin te Huziyan he Timpu

¹³Pemineg kew, sikiyu is egkagi te, “Guntaan ne emun kenà ne keeselem, edhendiyè ki te sevaha he inged. Ne zutun ki ebpetigayun taman te sengetuig wey ki mekemanggad.” ¹⁴Turebung kew su minsan is keeselem dà he hitavù, kenè ta egketuanen. Is untung ta zini te kelibutan,

ne utew mevavà ne iring te menipis he gapun he egketik-ew egkeahà ne egketik-ew zaan egkeawà. ¹⁵Meupiya pa ke egkagi ki te, “Emun idtugut kenita te Nengazen he kenè ki pa ebpatèy, ebeelan ta is iring dutun.”

¹⁶Iyan, sikiyu mulà, memepedeligen su idantal niw is ed-ul-ulahan niw, ne mezaat is iring dutun.

¹⁷Tentenuzi niw he ke netuenan te minsan hentei kenitew ke hengkey is meupiya he ed-ul-ulahan ne kenè din ed-ul-ulahan, nekesalà sikandin diyà te Megbevayà.

Is Sepian he Menge Etwew

5 ¹Pemineg kew zaan, sikiyu is sepian. Sinegew kew; erang kew, su utew merasey is egkeulaula niw keuzemà. ²Egkeredak en is menge ketigeyunan niw. Egketketen te ipes is manggad niw. ³Midtangis is menge selapì niw wey vulawan *su wazè niw gemita he idtavang. Ne is tangis, iyan tuus te keleleged niw ne tenged dutun utew mepait is silut keniyu keuzemà te andew te kedlimasa te menusiyà; su midtipigan niw is dekelà he kewasa kayi te menge ketepusan he andew.* ⁴Is selapì he wazè niw isuhul te edterebahu ziyà te menge tanè niw, ne iyan idsumbunga zan keniyu ziyà te Megbevayà. Is sumbung keniyu te nemenlegtey ziyà te menge luti niw, nezing en te utew mekegegehem he Nengazen. ⁵Dini te kelibutan utew meupiya is kebpekesavuk niw ne edlipey kew layun, iyan, iring kew guntaan te nati he ibpelambù he edlepaan su kunaan niw ke kenè kew egkesaut te andew te kedsilut. ⁶Su impesilutan niw wey mibunù niw is menge metazeng he etew, minsan pa te wazè dan medsukul keniyu.

Is Kebmeinentusen wey is Ked-ampù

⁷Ne sikiyu is menge zuma ku he tumutuu, kinahanglan he meinentusen kew taman te kedlikù te Nengazen. Su is ebasuk, ebpekeantus te kedtagad din taman te edsebpè en is impemula zin diyà te tanè din. Edtegazan din is uzan he ebpetuvù te pinemula zin wey is ebpeketesan te pinemula zin. ⁸Ne sikitew zaan, kinahanglan he ed-entusen tew is kebpeketagad tew. Edhegeten tew is kedsarig tew su megaan en is andew te kedlikù te Nengazen. ⁹Kenè kew, menge suled, meked-eepesà su wey kenè kew mesiluti te Megbevayà. Megaan en ebpekeuma is edsusi te menge ulaula ta; iring te ziyè en te gemawan. ¹⁰Menge suled, ed-iringan ta is kebmeinentusen te menge ebpeueven dengan te Megbevayà su zutun te kebpesevuta zan te Lalag te Nengazen nekeantus dan te kemeresayan. ¹¹Netuenan ta he utew sikandan deyzey su nekeantus dan te merasey. Netuenan niw en is kebmeinentusen dengan ni Hob wey is kedtuvazi kandin te Megbevayà dutun te nepasad en is penggezam kandin. Hihizuwen wey veligegawen is Nengazen.

¹²Menge suled, ebeleuzan ku sikiyu he emun duen ibpesarig niw kenè niw hegeta pinaagi te kebpengulivet wey kedsesapà. Kenè kew medsesapà

pinaagi te kegemita niw te minsan hengkey ziyà te langit wey zini te tanà te kebenaran niw te minge lalag niw. Uya zà wey wazà is gemita niw su wey kenè kew mesiluti te Megbevayà.

¹³Ke zuen minsan hentei keniyu he egkeseeng, kinahanglan he med-ampù. Ke zuen egkelipey, mekganta sikandin te kedalig te Megbevayà. ¹⁴Ke zuen egkezeruwan, kinahanglan he tewaga zin is minge ebmegurangan te minge tumutuu wey zan ikeampù wey meitisi sikandin te lana he ebpengumawen dan is ngazan te Nengazen. ¹⁵Is ked-ampù dan, emun hustu is kedsarig dan te Megbevayà, ne iyan igkeulii te egkezeruwan su ebewian sikandin te Nengazen, ne egkepesaylu sikandin te minge salè din. ¹⁶Ne tenged dutun kinahanglan he petudtudtulè kew te minge salè niw su wey iampù te kada sevaha is duma zin ne wey meulii is egkengezeruwan. Utew mekegegehem is ked-ampù te metazeng he etew. ¹⁷Si Elias dengan, etew zà sikandin he iring kenitew. Ne minsan pa zutun mezesen is ked-ampù din he kenà med-uzan ne wazà iyan mekeuzan taman te tetelu he tuig wey tengà. ¹⁸Ne mid-ampù en maan, ne mid-uzan te mereges ne human meketuvù is minge pinemula.

¹⁹Menge suled, ke zuen sevaha keniyu he egkesuwey zin wey egkelipatan din is tutuu he tuluuwen ne zuen ebpeketavang kandin wey mekelikù, ²⁰tentenuzi niw he is neketavang kandin, nehimu en he paagi wey melibri sikandin te silut. Ne pinaagi zutun egkepesaylu is utew mezakel he minge salà dutun he etew.